

Jahresbericht des Präsidenten vom MFC-Eschenbach

16. GV vom 20. Februar 2010, Buurehof Kuster Melch, Eschenbach

Liebi MFC-Mitglieder, Gschätzti Vorstandskollegä
Werti Ehremitglieder

Jahresrückblick 2009

Bereits anfangs April sind im Züghus-Gländ d' Motore vu dä Cross-Maschiene gstartet worde. Under dä Organisation vum Bini Schmucki hät s' füfti Jugend- und Fun-Motocross statt gfundä, und das, bi schönschem Wetter. Die Junge „Cracks“ sind afangs Saison **natürli voll** motiviert gsi, sie händ üs hochklassigi und spannendi Rennläuf bote. Bi denä hertä Usenandersetzigä, mit em Gegner, isch es au, und das ghört dezue, zu Stürz cho, die sind aber, zum Glück, praktisch alli glimpflich abgloffä. Mir händ nüd **nur en Super-**, sondern au en erflogrichä Alass törfe erläbe, **nachem** Helfer-Essä hät immer nu en **Gwünn vu rund Fr. 4000.**—use gluegät. Dä Gwünn isch aber nur möglich, dank grosszügigä Sponsore. So isch es au möglich gsi, dass jede Fahrer-, oder jedi FahrerIn, hät dörfe mit eme Pokal hei goh.

Herzlichä Dank a d'Sponsore-, und natürlich em Bini Schmucki, für die perfekt Organisation. Danke.

Das im Mai **keis** Töffli-Ralley statt gfundä hät, isch sicher nüd am Herbi sis verschuldä. Alles isch vorbereitet gsi-, das den aber praktisch kei Interesse besteht, mit dem hät niemer chönnö rechnä. Das Johr goht's zrück zum bewährte; dä Herbi organisiert s'12. SM.

De Pflingstusflug isch füecht und fröhlich gsi. Besichtigung vu dä Möhl-Mosterei in Arbon. Die 36 Teilnehmer sind professionell und sicher vum Werni Blöchliger dur d'Ostschwiz chauffiert worde. Ebeso sicher und planmässig hät dä Oski dä Tag gstatet. Zum krönende Abschluss sind mir im Frohsinn z'Chappelä vum feinste Bewirtet worde. Es lohnt sich immer, **sich sofort a z'meldä**, will-, die Pflingstusflüg sind jedesmol innert kürzeschter Zit usverkauft. **Aber** nüd ohni „**Chohlä**“, **will so-**, gits bim Oski-, **gar nüd z'holä!**

Oski, danke schön, für's ufgleisä!

Am Dorfturnier hämmer au teil gnoh. Vilä Dank Erwin und Rös !!

Vum Töff-Usflug is Elsass han ich nüd erfahrä. **Tannli** was git's do drüber z'brichtä ?? **Umweg?** öpper verlore gangä? **Stürz?** Oder **anderi Fürz?**

Es danke schön am Arnold Widmer, für d'Organisation.

Dä Eck Hörhager isch im Gägesatz zu dä Rennfahrer, mit sim Gefolge in höheri Gefilde gfare; Schwägalp und d'Sattelegg sind sini Ziel gsi.
Eck dörf ich dich bitte ! Danke schön!

Im Herbscht isch dänn dä Silvio Forster und sis Chilbi-Team wieder gfroget gsi. Bi däm **grusigä** und nasse Wätter-, sind d'Chilbikäfi-, **sehr** beliebt gsi. Aber au anders **isch i raue Mengä** über Thekä gschobe wordä. **Das** bewiest au die gsalzni Rechnig-, **vum** Getränke Fäh. Sie händ guet gschaffä, dä Foschi mit sinä HelferInä und Helfer, 3500.— Gwünn, das dörf sich gseh loh.
Danke em Silvio und natürlich au sirä Mannschaft, Applaus!

Somit chömer zu dä Johresmeisterschaft 2009:

Numä 42 Teilnehmer händ sich do dra beteiliget, **Tendenz** isch sinkend-, **was sehr schad isch**, will bi denä verschiedenä Disziplinä und Spiel goht's immer locker und lustig-, zue und her. **Viel spektakulär's** git's eigentlich nüd z'brichtä über die JM. **Aber zwei-**, drü Sache will ich **doch nu** speziell erwähnä.

Als 1: Herzliche Dank dä Jeanette und dä Berta. Wie nüd anders gwohnt, händ Sie für alli Teilnehmer ganz tolli und au passendi Prisä organisiert. Danke.

Als 2: Ich muess dä Osi e mol Frogä, wieviel Glückskäfer, das d'Irene eigentlich

scho hät? **Sie isch so berechnend**, Sie chunnt dä Trostpris-, **au das Jahr** wieder über !!

Als 3: Üse Fredi Müllhaupt; er leistet immer super Arbeit, sig's uf dä Chnü-,

i sim Job, oder au im MFC-Fasnachtsteam; **Aber: En Gratis-Tip-**, **hüetet eu**, dass ihr im Jasse **mit ihm** zäme chönnd. **Ich** bi sin Partner gsi im Chrüz-, bim Schieber-Jasse-, **aber trotzdem** hät er **mich** usätumpfet!!

Mit all denä Widrigkeitä fertig z'werdä, **s'isch nüd eifach!** Aber **dä Fredi-**,hät's nüd gschafft, **mich z'stopä-**, ich bin **trotzdem** Jahresmeister wordä!

Love- Peace, and Droug's !! s'Fasnachts-Motto **2010**;

13 Mega-Flower-Power-mässigi Typä-, händ au das Jahr wieder, dä MFC a dä Fasnacht im beschte Liecht präsentiert;

E so en Joint; isch scho nu öppis fein's! Do chas doch schneie und Chuttä was abe mag, **isch doch egal**, ziehsch eifach numol dra, **e so ne geil's feeling !!**

Das mir do z'Eschebach-, uf em Land, gsund läbet, dass wüset mir jo alli!

Aber-, wer weiss-??, wo in Eschebach-, **wachst s'beschti Gras ??**

Dä Blüemli seit: en klare Fall, die **allerfeinschti** Qualität-, die gfindsch-, **i dä Speerstrasse.**

Christian Rudel; *Chasch du dich bitte e mol* für d'Fasnachts-Hirni vum MFC

isetzä ??? **Ich bhauptä** au das Jahr wieder: **mir** händ nüd **nur dä gröschti**, sondern au wieder **dä schönschti** Fasnachtswagä gha !! Und jedes mol, **au passend** zum Motto! **Aber nei-, i Zitig** schaffets mir trotzdem nie! **Die** bringet

lieber-, **e paar so Böggä-**, **statt emol** es Föteli vu üsem **Super-Wagä!** Also Christian, **du häsch jo** en guetä Droht zu dä Medie, **mir** zehlät uf Dich!

Dä MFC hät i dä vergangenä Vereinsjahr **vieli-, grossi** Motorsport-Verastaltigä

durä gfuehrt. Zum so Aläss erfolgreich chönne z'verwürllichä **sind mir** uf Sponsore agwisä. Ich han bi derä Sponsore-Suechi immer gern mitghulfä.

Und das isch **e super** Erfahrig gsi, isch mer doch immer mit offene Arme empfangen worde. All die iheimische und regionalä Gönner sind em MFC **immer sehr grosszügig** gsinnt gsi, **nie** sind mir abgewiese worde.

Die alli verdienet e **ganz** grosses „Danke-Schön“ und en riesigä Applaus.

Sicher han i nüd all erwähnt, aber **nänd** mir das bitte nüd übel! Dä MFC isch

Stolz, im Wüsse, dass mir immer wieder **uf so** grosszügigi Sponsore und Gönner dörfet zehlä!! **DANKE VIELMOL !!**

Vor ziemli gnau 10 Jahr, am 3. März 01, bin ich s'erschti mol do vor eu

gstandä- und han mini 1. **GV** für dä MFC Eschenbach, dörfä leitä.

S'isch gar nüd eifach gsi!! Vor **so** viel Lüt ane z'stoh, macht scho e chli

kribelig und nervös. „**Wie** sind's echt z'friedä, hoffetlich mach i kei Fehler,

vergiss jo niemerem danke z'sägä-, **die-, und nu anderiGedanke** sind mir de im Kopf umä gschwirrt! Ich mag mich

erinnerä, dass i sehr- agspannt gsi bin. **Und hüt**, stohn ich scho zum 10. Mol do. **G'spannt-**, bin i immer nu, **nüd druf, öbs klappät**, sondern-, **uf Gnagi !!**

Nüd, das ihr glaubet, es isch **nur nu Routine**, aber sicher goht's-, jetzt, es

Stuck eifacher, als au scho! **S'eifacher**, betrifft aber nur-, Präsentation, **nüd**

aber d'Vorbereitig. **Die** fällt mir nämli immer schwerer. S'isch scho fascht

es Müessä. **Und das** sind schlechti Voraussetzigä!

Dä tolli Verein;dä MFC Eschebach-, verdient's, dass mer mid **Elan und Freud**

däbi isch. Und i mim Amt, als Präsident, isch die Freud, i dä letschtä Zit, **nüd**

immer vorhandä gsi. Und drum-, isch jetzt au dä richtigi Zitpunkt, **zum ufhöre**. Wie ich scho voreme Jahr mitteilt

han, isch das hüt mini letschti Generalversammlig vum MFC Eschenbach, **als Präsident**.

S'isch e tolli Zit gsi, s'hät würllich au Spass gmacht. Mit so **super** Mitglieder,

wie ihr das sind, isch es ä Freud, zämä z'schaffä. Und mit **DEM-**, Vorstand,

e so gschaffigi Kollegä, **isch es eigetlich eifach**, Präsi z'si. **Aber trotzdem!!**

Mim Nachfolger, **wer's** au immer si wirt, wünsch ich ebefalls, e so e **schöni**

und erfolgrichi Zit, bim MFC.

Eu allne, liebi MFC-Mitglieder;**E ganz grosses und herzlich's Danke-Schön-**,

für's Vertrauä, wo ihr mir i denä Jahre erwiese händ.

Dodemit bin ich am Ändi vum Jahresbricht. **Danke!**

Eschenbach, 20. Februar 2010

MFC Eschenbach, der Präsident: Albert „Bibi“ Erb